

嘯

亭

雜

錄

嘯亭雜錄卷之八

內務府定制

自古宮禁服御飲食燕好必須有專司之者惟周禮分司各官統屬冢宰所以合宮府為一體其制實為良美後世人主皆委官寺掌之故閹人得以專擅因之越俎犯章干預國柄皆因替御僕夫不得其人故也我朝龍興之初初立內務府以往昔之舊僕專司其事入關後復以明三十二衛人附麗之凡內廷之會計服御物飾宮御武備等皆統屬於內務府大臣紀綱嚴肅與周制統

屬於冢宰之制相符其閤人寺官則惟使之供給洒掃之役毋得  
任事將漢唐宋明歷代諸弊政一旦廓而清之其法度之精詳規  
模之宏遠尤為超越千古矣其職掌廣儲司凡庫有六曰銀庫曰  
緞疋曰衣庫曰茶庫曰皮庫曰瓷器庫各有專司惟茶庫兼收人  
淺為六庫中之最要初名御用監順治十八年改設專司焉其初  
本府進項不敷用時檄取戶部庫銀以為接濟乾隆中 上親為  
裁定汰去冗費若干歲支用六十餘萬兩其後歲為盈積反充外  
府之用較諸明代每勒取金花銀兩徒充閤人之囊橐者真不啻  
霄壤之別也會計司掌領皇莊田畝諸事田地各有等第 盛京

莊八十有四一等莊三十五二等莊十三等莊八四等莊三十四  
山海關外莊二百十有一一等莊六十六二等莊四三等莊二十  
四等莊百二十一喜峯口古北口外莊百三十八均一等歸化城  
莊十有三畿輔莊三百二十有二一等五十七二等十有六三等  
三十八四等二百十有一半莊七十一每莊設莊長一人瓜田菜  
園置長亦如之莊賦共地一萬三千二百七十二頃八十畝有奇  
賦糧九萬三千四百四十石菽二千二百二十五石芻八萬一千  
九百四十束谷有奇凡編比壯丁每三年一次 盛京及關外口  
外各莊由總管將軍都統等畿輔由府委官各具冊於府由府彙

冊奏 聞凡皇子分封各按爵秩給以莊地人丁公主郡主贈嫁  
亦如之選宮女於內府三旗佐領內管領下女子年十三以上者  
造冊送府奏交宮殿監督領侍等引 見入選者留 宮餘令其  
父母擇配其留宮之女至二十五歲遣還擇配凡收錄內監由禮  
部冊列姓名籍貫移府總管太監察其來由無異乃委年老內監  
一人驗實具奏候 旨分撥年老耄聽其回籍為民凡支領內監  
月費執事人匠役餼廩皆隸之掌儀司凡饗 奉先殿之禮於  
大內景運門之東建 奉先殿朔望瞻拜時節薦新牲忌祭享出  
入啟告以展孝思 前殿 後殿均九殿中為穿堂以聯前後燎

以周垣供奉 列聖 列后神牌凡朔望 萬壽聖節元旦冬日  
及國有大慶均恭奉 列聖神牌 前殿祭享禮成還御 後殿  
寢室其禮儀祭器一如 太廟之制惟不設牲俎不行飲福受胙  
禮王公不陪祭其樂名貽平敕平敷平紹平光平儀平諸名異於  
太廟之奏其遣官行禮亦與 太廟儀同凡遇 列聖 列后  
諸 聖誕忌辰及元宵清明中元霜降歲除等日於 後殿行禮  
神位前設有鐙酒脯果實焉 壽皇殿尊奉 仁皇帝 憲皇  
帝 純皇帝御容凡遇 聖誕及忌辰 皇上躬率 諸皇子及  
近支王展謁行禮其歲時奠獻一如事生儀凡燕外藩之禮歲除

及正月十五日 賜外藩蒙古宴奏請 欽命進酒大臣內管領  
備筵九十席宴於 保和殿及 正大光明殿屆時鴻臚寺理藩  
院引蒙古王公台吉入領侍衛內大臣序王公班次八旗一二品  
武職亦預焉 皇上陞奏隆平之章蒙古王公武大臣各就席行  
一叩禮座尚茶正陞通 御筵降通進茶丹陞清樂作奏海宇昇  
平日章尚茶正率侍衛等舉茶案由中道進至檐下正中北嚮跪  
注茶於碗進茶大臣奉茶入中門羣臣皆就本位跪進茶大臣由  
中陞升至 御前進茶退立於西 上飲茶與宴之臣僚咸行一  
叩禮進茶大臣跪受茶碗由右陞降出中門眾皆坐侍衛等分

賜與宴臣僚茶皆於本位一叩飲畢復行一叩禮尚茶正徹茶案  
退樂止展席幕乃進酒如進茶儀進酒大臣出尚膳正率尚膳進  
膳殿廷清樂奏萬象清甯之章尚膳正奉 旨分賜食品於各席  
遍樂止奏慶隆舞揚烈舞儀見後卷以次畢 殿內奏喜起舞畢 上  
簡召王公大臣賜酒庫臣咸跪受一叩卒飲朝鮮國俳進百伎並  
作退尚膳正升徹 御筵降與宴之王公大臣等謝宴行一跪三  
叩禮丹陛大樂作奏治平之章 皇上還宮鴻臚寺理藩院引外  
藩及百官以次退 皇子成婚公主下嫁設宴其邸與 內廷宴  
同凡 皇子婚禮先期移文欽天監諏吉以 聞乃命夫婦偕老



之大臣傳制曰以某官女某氏作配我 皇幾子為福晉福晉父  
闔族謝 恩行三跪九叩禮擇吉簡內大臣侍衛隨 皇子詣福  
晉家行定親禮福晉父率闔族綵服迎於大門外延 皇子入至  
正寢於福晉父母前行三叩禮畢 皇子回宮福晉父率族人送  
大門外詠吉行納采禮以內務府大臣宮殿監督領侍充使及門  
福晉父迎入中堂謝 恩行三跪九叩禮與宴大臣陪福晉父及  
族人之在官者宴於中堂內務府命婦女官同陪女眷宴於內室  
畢內務府大臣暨宮殿監督領侍回朝復 命成婚先一日 皇  
子於 皇上 皇前行禮福晉母率諸婦至 皇子所居宮中

設牀帳粧奩工部於宮門及皇子所居宮皆懸綵屆吉時於  
皇子宮設錦褥二東西嚮設酒饌案於前置兩爵兩盃於案請  
皇子西面福晉東面相嚮行兩拜禮各就坐執事者執金瓶女官  
以盃爵酌酒合和以進皇子與福晉皆飲乃進饌酒饌三行  
皇子與福晉皆起仍行兩拜禮徹饌案次日皇子偕福晉朝見  
皇上皇后女官二人引皇子居左稍前行三跪九叩禮福  
晉居右稍後行六肅三跪三叩禮公主下嫁亦如之王公之女奉  
旨授為和碩公主郡主暨宗女撫養中宮者其下嫁之禮各  
視爵秩以別差等筵宴會禮部辦理其進時憲書進春牛皆如禮

部儀凡妃嬪大事皆會禮工二部按例遵行都虞司掌 內府兵衛等事凡訓練內府護軍驍騎歲以春秋二季由該管官督率操演各賞罰有差凡宿衛 大內護軍統領宿 神武門內掌 順貞門鑰其 大內後複道中皆內務府護軍直宿其直宿西華門北者合護軍驍騎步軍及三旗服役人鑾儀衛校尉別立班次曰防範兵專司戒火凡 皇后 內廷主位出入以內務府總管或散秩大臣一人司官八人內府護軍統領一人護軍參領四人護軍校十人率護衛豹尾班執鎗者十人佩儀刀者十人翊衛護軍百人導引扈從 皇子福晉出入遞減騎從凡畿輔 行宮京東

七處京西四處京北六處口外十三處各設千總若干人分隸湯  
山盤山黃新莊熱河各總管管轄凡捕牲烏刺官弁亦隸屬焉慎  
刑司專理太監蘇拉等詞訟凡審獄內府所屬人犯罪在杖一百  
以下者本司依律議結杖以上者皆移送刑部定擬如事干 宮  
禁者請 旨鞠問凡內監私逃按其次數分別自首被獲治以枷  
杖之罪營造司凡匠役均有定額內府所屬人在官執藝者於佐  
領管領下選取招募民匠於工部咨取又設司匠領催以督率之  
缺則取補惰則革除凡修造 紫禁城內工程小修大修建造皆  
會工部 大內繕完由內監匠人 皇城牆垣有應修理者奏交

工部均由欽天監諏吉興工慶豐司凡牧所定額設 內三圈於西華門外養扇牛十有二牯牛六牝牛三青牛一乳牛無定數設三外圈於 南苑設羊六圈於豐臺設牛羊羣牧於張家口外各牧所牛羊均由該管官烙印凡典牧凡設廐長廐副若干人廐丁司菽等夫以遞增減口外牧羣設總管一人副管二人牛羊羣協領牧長牧副牧丁若干人隸張家口外總管管轄大凌河牛羣隸盛京將軍管轄凡 郊 廟祭祀皆用廐牛馬凡出牧歲以三月十五日後四月初一日前均於 南苑空閑豐草之處牧放停止芻菽以九月二十日後十月初五日前各歸原圈飼養凡勸懲

內外各園視牛犢斃損之多寡以別功過游牧諸羣每三牛三年  
孳生一犢三羊三年孳生二羔於定數內缺少者治罪定數外孳  
生者由該總管奏聞上駟院凡園牧設內廐於皇城廐於  
南苑設牧羣於盛京及張家口外以畜馬蕃庶積其數而頒之  
凡出牧勸懲稽查與慶豐司牛羊同凡供直馬以內廐御馬四齊  
其毛具鞍轡立院門外行幸駐蹕以御馬六立園門右如之  
凡遇車駕巡幸日以十馬備上乘御由內院大臣奏請於  
御馬內簡其尤良者以從其需用駕車馬公馬及索駝之數附疏  
以聞其扈蹕之各執事官役內監所乘之馬由所司行院如

數以公馬撥給凡調馬歲春秋二祭禱馬於神繫帛於御馬鬣尾  
以為識凡三十匹附養四色馬四十匹今祭 堂子率以十匹詣  
神前受釐繫絲帛亦如之奉宸苑掌 御園亭河道 南苑西  
山稻田諸事凡網戶沙河二十六人霸州四十六人江南六人歲  
給銀米有差其河道應通濬者知會工部修理凡稻田玉泉山十  
有五頃供 上方玉食餘田三十餘頃皆徵租賦 御河三海諸  
處歲各有蓮藕之租均量地薄徵以供 內廷蒔植花卉之用武  
備院掌 上甲冑弓矢兵仗及鞍轡行帳諸事凡御蓋 皇上御  
殿設繡蓋 巡幸鹵簿設黃羅銷金九龍三檐曲柄華蓋凡設褥

上春冬用黑貂夏秋用黃龍綺均於換季日更易凡兵仗皆由院敬謹修造御用弓矢皆選盛京之良楛砮石成造凡採辦物料歲支崇文門稅務銀千兩交各省敬謹採辦以上皆內府之所專司若內務府大臣得人則宮府之禁禁嚴紀綱肅整實為超軼漢唐諸制多矣

### 堂子

國家起自遼瀋有設竿祭天之禮又總祀社稷諸神祇於靜室名曰堂子實與古明堂會祀羣神之制相符猶沿古禮也既定鼎中原建堂子於長安左門外建祭神殿於正中即彙祀



諸神祇者南向。前為拜。天圓殿殿南正中設。大內致祭立杆石座。次稍後兩翼分設。各六行。行各六重。第一重為諸皇子致祭。立杆石座。諸王貝勒公等各依次序。列均北向。東南建上神殿。南向。相傳為祀明將鄧子龍。位蓋子龍與太祖有舊誼。故附祀之。歲正朔。皇上率宗室王公滿一品文武官詣堂子行拜。天禮凡立杆祭神於堂子之禮。歲以季春季秋月朔日舉行。祭日懸黃幡繫綵繩。綴五色繒百縷。楮帛二十有七。備陳香燈司俎官於大內恭請神位。由坤甯宮以綵亭舁出行中路。至堂子安奉於祭。神殿內東向陳糕餌九盤。酒琖三。圓殿

陳糕餌三酒琰一楮帛如數司俎官以贊祀致辭行禮 大內致

祭後越日為馬祭 神於堂子如儀凡月祭孟春上旬三日餘月

朔日 大內遣司俎官率 堂子官吏於 圓殿奠獻糕酒行禮

如儀是日內領管一人於 上神殿獻糕酒楮帛親郡王各遣護

衛一人於 上神殿獻楮帛凡浴佛之禮歲以孟夏上旬八日司

俎官率執事人等自 大內請佛至 堂子祭 神殿陳香盤獻

糕酒王公各遣人獻糕執事獻盥盤贊祀二人浴佛畢六酌獻三

致禱如儀是日 大內及軍民人等不祈禱不祭神禁屠宰不理

刑名凡出師展拜 堂子之禮 皇上親征如征萬國事詠吉起

仁皇帝

行內府官預設 御拜褥於 圓殿外及內門外 御營黃龍大  
纛前兵部陳螺角鑾儀衛陳鹵簿均如儀 皇上先詣 圓殿次  
詣纛前均行三跪九叩禮六軍凱旋 皇上入都門先詣 堂子  
行禮 命將出師 皇上率大將軍及隨征將士詣 堂子行禮  
儀均與 親征同凱旋日詣 堂子行告成禮均與古之禡祠告  
功明堂之禮相同實 國家祈禱之虔 百神之所佑庇與商周  
之制若合符節所以綿億萬載之基也

額經畧

額經畧

爾登保

吉林人少以侍衛從傅文襄王征臺灣廓爾喀苗

疆諸部落有功游至護軍統領楚苗之役公受瘡得疾時傳文襄  
和宣勇相繼卒亦有傳公已故者其家已為之設位祭久之始知  
其訛嘉慶己未冬授經略督辦三省教匪公雖武人為富尚書德  
甥故夙知兵法待下過嚴厲然遇有功者必親為撫視又延胡學  
士必顯為幕客凡出師皆請其參酌故每戰必勝賊皆畏懼聞慶  
總憲溥言公行師川楚時如數日不遇賊則抑鬱不樂鞭撻士卒  
不已聞鼙鼓聲即踴躍據鞍指揮三軍欣然從事及凱師歸公必  
命烹肥羊呼眾將士至邀與同食公親持刀為之割削視諸將如  
骨肉言語質朴如達其制則當筵謾罵初不少貸一日游總兵雲

棟違公節制至敗劬公罵之曰汝何畜產乃敢違乃公令以致敗辱如楊遇春小兒斷不至若此時楊方在坐而公初不顧忌其真率也若此故人皆為之用命甲子春歸朝任御前大臣余於朝廊遇之高不逾中人性初不意其勇烈若此也乙丑秋病篤時上遣莊親王往視王嘉其勲績公瞪目曰吾有功公可計殊愧死矣其謙冲又如此然性好殺戮擒賊至無論老稚盡皆殲滅嘗曰母留此賊種致他日更生事變也故卒無嗣人皆為之惜云

札克塔爾

札克塔爾金川番部人其父某為索諾木所殺故公自弱冠投誠

因秘獻入番捷徑阿文成公得以進兵成功 純皇帝憐其幼稚  
命近臣撫視之後游至護軍統領公雖外夷性敏捷川楚之役公  
每膺師旅未嘗敗北軍中敬畏之呼田苗張無敢撓其鋒者丙寅  
秋瓦柴關兵變公首趨赴時西安駐防兵已為賊冲潰勢甚猖獗  
公怒馬獨出手殺數賊賊有識之者詫曰苗張至矣因皆奔潰楊  
時齋提督繼至為之撫慰賊皆棄甲請降是役往返不逾二十日  
皆二公之功也壬甲春病卒於邸 上悼惜之賜金幣令人董其  
喪焉

西山活佛

乾隆乙巳丙午間有順義民婦張李氏善醫術兼之符籙祈禱之事病者服其藥輒瘥又有宦家婦女為之延譽爭建西山三教菴西峯寺與之居處為供奉號為西山老佛後燒香者既眾男女雜沓頗有桑間濮上之疑為有司所懲治將張李氏伏法其風始熄云

### 法和尚

乾隆中有法和尚者居城東某寺勢甚薰赫所結交皆王公貴客於寺中設賭局誘富室子弟聚博又私蓄諸女伎日夜淫縱其富通王侯人莫敢撻果毅公

阿里

惡其壞法乃令番役陰夜踰垣

擒之盡獲其不法諸狀阿恐獄緩為之緩頰者眾乃遍集諸寺僧  
寮立斃杖下踰時要津之托始至已無及矣人爭快之至於市井  
間繪圖鬻之久未已也

### 阿里瑪

國初有驍將阿里瑪者能自握其髮足懸於地又能舉盛京實  
勝寺之石獅重踰千斤戰功甚鉅入京後所為多不法章皇帝  
欲置於法恐其難制有巴圖魯占者其勇亞於阿因命其擒之占  
至阿郎故與之語猝握其指阿怒以手拂占擲於庭外數十武因  
數之曰汝何等人乃敢與吾門勇耶占以上命告阿笑曰好男



兒安惜死為何須用紿計耶因受縛坐車中赴市曹至宣武門阿  
曰死則死耳余滿洲人終不使漢兒見之誅於門內可也因以足  
絙城門甕洞間車不能行行刑者從其語阿延頸受戮其頸脉如  
鐵刀不能下阿自命占以佩刀割其筋然後伏法亦一奇男子也

### 三焦

醫家載十二經之脉其所言手少陽三焦者人莫能指其定處諸  
醫家或分上中下三俞為三焦以敷衍之然六陽經絡皆為六腑  
之所繫故命為陽未可統指背俞謾無定所蓋三焦男子藏精之  
處為腎臟之外腑腎賦形有二故膀胱三焦分為其腑即命門之

關鍵也或有被礫刑者見其膀胱後別有白膜包裹精液此卽三焦之謂也世之盲醫不察而忘相指擬故使十二經之名殊缺其一亦古今行醫者之所宜曉也

### 秦腔

自隋時以龜茲樂入於燕曲致使古音湮失而番樂橫行故琵琶樂器為今樂之祖蓋其四絃能統攝二十八調也今崑腔北曲卽其遺音南曲雖未知其始蓋卽小詞之濫觴是以崑曲雖繁音促節居多然其音調猶餘古之遺意惟弋腔不知起於何時其銃鉦喧闐唱口囁雜實難供雅人之耳目近日有秦腔宜簧腔亂彈諸

曲名其詞淫褻猥鄙皆街談巷議之語易入市人之耳又其音靡靡可聽有時可以節憂故趨附日眾雖屢經明旨禁之而其調終不能止亦一時習尚然也

### 王樹勲

王樹勲江都人其父某曾任微職樹勲幼入京應試不售乃於廣慧寺為僧法名明心性聰悟剽竊佛氏絮語以為直通圓覺又假扶乩卜筮諸異術京師士大夫多崇信之樹勲以重賄賂諸人之聞寺故多探刺其陰私事而楊言於外故人俞尊奉之蔣予蒲龐士冠等以詞垣名流甘列弟子之位其餘達官顯宦為其門人者

無算朱文正公正人也亦與之談晤其他可知矣為和相所訪拏  
樹勲復以重賄賂司員吉倫為之袒護因未減其罪勒令還俗而  
己樹勲後游蕩江湖間時值川楚教匪倡亂松相公筠時督師湖  
北樹勲仗策軍門松公故喜佛法樹勲投其意指公大賞鑒因命  
易裝為道士入某寨中說賊降公大悅獎以七品官銜樹勲復從  
軍數載積功至襄陽太守嘗入都引見刑部尚書金光悌貪吏  
也因其子病劇延樹勲醫治樹勲沐以福福光悌至長跪請命人  
聞傳為笑談為御史石公承泰登諸白簡上下其章訊之得實  
上獎之曰真御史也因褫樹勲職遣戍黑龍江光悌以先物故

得免置議蔣子蒲宋鎔等黜降有差夫樹勲以一浮蕩僧人乃敢以口舌千請諸大僚為之薦引致身二千石之貴其雖遭遣戍謫死窮荒不無厚幸諸名士以翰墨名流而甘為縑衣弟子以至遭其笞撻之辱亦可謂斯文埽地矣

畫眉楊

京師有善作口伎者能為百鳥之語其效畫眉尤酷似故人皆以鸞鳳翱翔戛戛和鳴如聞在天際者至於午夜寒雞孤牀蟋蟀無不酷似一日作黃鳥聲如睨睨於綠樹濃陰中韓孝廉<sub>崧</sub>觸其思鄉之感因之落涕亦可知其伎矣

魏長生

魏長生四川金堂人行三秦腔之花旦也甲午夏入都年已逾三旬外時京中盛行弋腔諸士大夫厭其囂雜殊乏聲色之娛長生因之變為秦腔辭雖鄙猥然其繁音促節嗚嗚動人兼之演諸淫褻之狀皆人所罕見者故名動京師凡王公貴位以至詞垣粉署無不傾擲纏頭數千百一時不得識交魏三者無以為人其徒陳銀官復髻齡韶秀當時有青出於藍之譽長生既蓄厚貲乃抽身歸里陳遂繼其師業當時百官殷富習俗奢靡故二子得以媚取為和相所覺察因荷校銀官於緹帥署前以辱之為緩頰者皆謫

貶有差乃逐陳銀歸川中其風稍息銀官不知所終嘉慶辛酉長  
生復入都其所蓄已蕩盡年逾知命猶復當場賣笑人以其名重  
故多交結之然婆婆一老娘無復當日之姿媚矣壬戌送春日卒  
於旅卽貧無以殮受其惠者為董其喪始得歸柩於里長生雖優  
伶頗有俠氣庚子南城火災形家言西南有劍氣沖擊長生因建  
文昌祠以厭勝又納蘭太博孫成安者初與其狎昵後遇事遣戍  
歸貧無以立長生嘗贈恤之亦其難能也

### 茅麓山

茅麓山在鄖陽界毗連三省廣數千里明末時流賊餘黨郝搖旗

等竄入其中復有明疎宗某郝等崇奉為主恃險假息康熙初命  
圖文襄公海為督師同川督李公國英護軍統領穆公哩瑪率三  
省兵會勦諸將皆於層巖陡壁間草衣卉服攀援荆葛而進邇年  
始蕩平其巢穴故今京師中諺語有其事險難者則曰又上茅麓  
山耶則當日之形勢可知矣

煙蘭小譜

自魏長生以秦腔首倡於京都其繼之者如雲有王湘雲者湖北  
沔陽人善秦腔貌疎秀為士大夫所賞識有宗臣某嘗折其園中  
樓閣為其償逋債湘雲性幽藹善繪墨蘭頗多風趣余太史集為



之作煙蘭小譜以紀一時花月之盛以湘雲為魁選云後湘雲改業為商賈家頗富饒至今猶在云

### 喬道人

乾隆庚戌辛亥間有喬道人自陝右至貌清癯霍立面微暈紅自云數百歲曾經明末鼎革事與孫百谷周忠武相交言皆妄誕然談兵家事厯厯如繪或云為年大將軍之潰卒曾經青海戰事故所言了了然無左證也今漕帥李公奕璘深為崇奉喬居一小菴中飲啖如常毫無他異壬戌五月中卒於旅邸亦卒無他奇驗蓋如抱朴子所言古強類也又有某道士居西城紅廟玉皇閣能預

知和相死期辛酉夏大雨鉏鉏祿縋帥明安嘗延其在海陵寺中築壇祈晴頗有小驗上以其惑眾命逐出境外亦不知其所終

### 岳少保之死

昔蘇東坡以不及見范文正公為恨蓋不同朝故也岳少保起入為少宗伯時余已任散秩大臣因直宿中禁不得常至西苑故未能與公一會至今心猶耿耿聞公入都時已抱沉疴京中素無邸舍因寓居友人家中後病篤時遷於某寺中龕燈總帳渾如旅客實近日大僚中所罕見者其夫人賴友生為之置室親織紵以度日而其本旗都統某因公有代屬員分賠款項立偪夫人鬻室

充公人皆為之切齒未逾歲某卒以貪事敗死

毒死幕客

有某江督任蘇撫時其父為福建將軍某歲出洋船數百艘名為其父飲膳之資實陰鬻米於外洋以獲重利皆幕客某為之經理後江督高文端晉聞客練達幕事欲親為延聘某公恐洩其陰事因延幕客會飲置毒酒中以滅其口至今蘇人猶能言之

閔撫軍

閔撫軍鶚元烏程人中乙丑進士累任安徽江蘇巡撫初任皖時以廉潔自重布衣蔬食接見僚屬必談性理近思錄諸書背誦如

馮水狀人皆服讐袁簡齋先生笑曰如其廉潔果實不過高平氏之孽子流耳況外木強而內多狡詐不近人情乃王荊公之絮餘徒貽害蒼生耳人皆以其言為過當及撫吳日頗改前節芑苴日進動踰千萬人始服袁之言時李昭信相國以貪墨獲罪上嚴諭令各督撫議其罪人皆希上旨以為可誅獨閔探知上有憐才意乃以議貴議功為言復以諸督撫養廉實不敷用必須受諸陋規始足以充公項等語上雖嚴斥心是其語李相因之未減其罪時以其弟獲罪降為三品頂帶故吳人諺曰議貴議功一言活昭信中堂難逃青史偽仁偽義三品留江蘇巡撫無補蒼生

云後以庇屬員冒徵案獲罪遣戍人爭快之其家置產券約皆惟書文字蓋豫防籍沒也其用心豁刻如此

### 李中丞

李中丞湖江西人屢任封疆以廉能著撫粵時海盜充斥邊民為之逋數督臣巴延三性懦怯不能制公設關禁嚴為查究諭將士泛重洋冒波濤嚴為捕緝未逾年擒盜數千人公誅首惡其餘皆縱之日此亦吾民何忍使櫻白刃也故民皆感服輿人誦曰廣東其樂土來了李巡撫之語卒以勞瘁卒上甚悼之謚公毅庵其子為中書

舒梁河三公遠見

乾隆初政令寬大一時輔弼大臣皆忠正有遠略嘗見梁文莊詩  
正掌戶部時上疏稿覈計度支盈絀如在指掌略言每歲天下租  
賦除官兵俸餉各項經費外惟餘二百餘萬實不足備水旱兵戈  
之用今雖府庫充盈然乞皇上以節儉為要慎勿興土木之功  
蹟武之師以為持盈保泰之計當時人皆咎其言利至嘉慶初年  
河水屢溢漫口川楚教匪用兵九載國帑為之告匱始服公之遠  
識預定於五六十年前也壬辰癸巳間純皇帝以八旗火器未  
備因建營於藍靛廠間欲令鳥鎗兵丁皆攜家往往以便演習舒

文襄公上言火器為 國家要務不可使盡居城外以致內城無  
備倉卒用之難以立至 上從其言因分為內外二營至嘉慶癸  
酉秋林清之變有賴內營火器始能即時撲滅又西域初定公上  
言命商賈販紬緞往新疆皆令官與之平準而命其攜銀以歸不  
許私置貨物人關以干禁令蓋預防內地銀兩有所虧缺也又乾  
隆庚子 上以天下殷富乃議改綠營名糧名為公費而招募補  
實其額以為足兵之計阿文成公力言不可和相希 上意乃改  
巡捕五營之制天下督撫因而議符歲糜費 國帑三百餘萬  
國用因之不足甲戌春 今上從廷臣議始復舊制若三公者可

謂謀慮深遠得輔相之道矣

### 馬侯

奉義侯馬蘭泰者元裔也其祖某國初時歸降最先故膺五等之封雍正中北征準噶爾馬為副將軍屯察汗赤柳軍中無以為娛馬乃選兵丁中之韶美者傳粉女裝襖衣長袖教以歌舞日夜會飲於穹幕中為他將帥所舉發奪爵遣戍焉

### 信勇公

信勇公瑪木特厄魯特人初為準噶爾宰桑乾隆癸酉杜爾伯特汗策凌來降後事見卷達瓦齊遣公追之既入邊復逸出副都統達青



阿誘公擒之 純皇帝諭曰瑪木特儻名之不至或至而心懷不服則擒之可今遣使往輒至不明懲其罪反誘擒非也 詔宥罪遣歸給衣冠公感 上恩稽首而還後我兵入公感激前事且念達瓦齊不足事乃赴副將軍薩拉爾軍請內徙因入覲 上念歸志誠信授內大臣時議征達瓦齊以阿睦爾撒納為左副將軍以公為叅贊公密奏曰阿睦爾撒納豺狼也雖降不可命往往必為殃 上以不逆詐諭之軍抵伊犁公多贊化功封三等信勇公賞雙眼孔雀翎四團龍服命守扎哈沁以疾留伊犁聞阿逆叛前事見卷將脫歸乏兵衛為逆黨擒赴阿逆所阿逆慰之曰準噶爾與天朝

疆域殊異爾欲向內何也不如歸我當善視之公怒唾而言曰天下豈有無君之國哉達瓦齊纂而虐聖天子討其罪噶爾丹策凌嗣已絕我不內歸將焉往且天朝已擒我不即誅復釋還此所謂生死而肉骨也何忍背之爾先我往聖天子待爾厚爾乃謀逆今既擒我我何懼死則死爾大軍至將磔汝犬猶不食爾肉也阿逆慚縊殺之事聞上震悼御製烈士行以獎之公生長窮荒乃知忠義若爾實為中原士大夫之所宜景行者也

仙提督

仙提督 爲 劄

山東人甲午秋王倫叛逆時公為千總隨副都統尹

公吉圖入汪家小樓榕緝王倫尹公驟抱倫背為賊黨刀劍叢至  
尹公撲地公奮身前救尹公出因背受刃傷如畫三日乃甦舒文  
襄公奏聞上立擢為守備後游至湖南提督征苗匪時有勞績  
焉

### 富公

宗室輔國公富春者敬謹莊親王裔也任杭州將軍時撫軍王亶  
望貪吏也性耽聲色元旦拜聖牌王以酒困故日中始至公正  
色責曰元日履端茲始拜牌臣子禮儀安可遽延若是殊玩愒  
於時日也王長跽請謝公退謂人曰王公其不久乎為人臣者不

以篤敬將事能無遭天譴乎逾年王果以貪縱敗卒如公言

### 李毓昌

李縣令 毓昌 山東即墨人中嘉慶戊辰進士揀發江蘇試用淮安  
報水災大吏遣公往查核故事凡委員往漫不省察惟收其陋規  
而已山陽令王伸漢貪吏也有冒增戶口事為公訪察將欲舉發  
伸漢懼乞太守王某代為緩頰公力拒之伸漢乃遣其僕色祥乞  
公從者李祥顧祥姚陞等私以賄進言公正色曰今歲某赴科場  
皇上所命題即以德本財未為言某雖不肖敢欺 君納賄耶  
明日並以此稟諸制府可也李祥等報顧退告諸色祥色祥懼因

以其賄贈顧祥姚陞等命謀害公以滅口顧祥等許諾是晚公赴太守宴歸明早即欲解纜時公寓古寺中寂聞無人夜間公獨酌自遣僕等因以毒酒進公飲覺之遂停杯血流於頤僕等愈懼因以帛勒死之以自縊聞王伸漢并賄通檢驗者遂朦朧通稟公樞歸家公叔某於褻衣中覩血迹因上控都察院上大怒會緹帥緝獲姚陞盡得其實然後逮伸漢入鞫供如前因立置典刑色祥顧祥李祥姚陞等皆正法贈公知府銜廕其子為舉人上復御製詩以旌之或云公樞歸時其家已釋然公託夢於其叔言其屈枉已授江都城隍神位篋中有血衣可證其叔如其言啟篋視之

果然因而成訟其語近誕不足信也

石倉十二代詩選

四庫全書提要云石倉十二代詩選五百六卷曹學佺著學佺工詩去取頗有別裁其明詩分初集次集千頃堂書目尚三集四集五集六集三百八十四卷近佚云今余家所藏則一千七百四十三卷較四庫所收多至千餘卷矣古逸詩十三卷唐詩一百卷拾遺十卷宋詩一百七卷元詩五十卷明初集八十六卷次集一百四十卷三集一百卷四集一百三十二卷五集五十二卷六集一百卷七集一百卷八集一百零一卷九集十一冊十集四冊續集

十冊再續集九冊三續集五冊三四續集四五續集一冊五續集  
三冊五六續集一冊南直集八冊浙集八冊閩集八冊社集十冊  
楚集四冊川集一冊江西集一冊陝西集一冊河南集一冊九集  
後不分卷以冊代卷其曰三四續四五續義例難通而雕鐫完好  
刷印清楚自是閩中初榻精本法時帆祭酒頗加賞鑒以為近世  
難覓之本惟七集八集中數卷為王功偉明經攜去以致遺佚不  
復得為全豹殊堪扼腕也

恒待衛

宗室待衛公恒斌  
字綱文

太宗文皇帝第十子輔國公韜塞裔

也充三等侍衛父薩喇善官吉林將軍以事謫伊犁方卧病不起  
公奮然曰古人有身代父役者吾何不為遂陳情當事乞代奏有  
旨責其沽名褻職仍命從父行純皇帝殊惻然也公竟行  
晝夜侍父疾至廢寢食父每怒其愚公無幾微怨抵伊犁父疾以  
廖阿文成公時為伊犁將軍賢其行尋哈薩克新附遣使入貢奉  
旨擇賢員伴送阿公因命公充伴送官入京途間馭陪臣忠信  
得大體上召見加慰藉仍授三等侍衛留京供職蓋特恩也  
公請畢伴送事仍往伊犁事父上允之擢二等侍衛三十年烏  
什回人叛公隨明忠烈公瑞由伊犁倍道進抵烏什戰屢捷三月



朔領兵為左翼陣城南山下接戰賊更廣至公奮勇邀擊之所向披靡賊懼隱城壕誘公公怒馬前萬鏃齊發不及禦歿於陣事聞上軫惜因宥其父罪還京賜卹如例瘞雲騎尉

### 傅文忠之謙

傅文忠公恒以椒房勲戚當朝軸者幾三十年惟以尊奉前輩引摧後進為要務故一時英俊之士多集於朝如孫文定嘉淦岳威信鍾琪盧巡撫焯等皆起自廢棄田里畢制府沅孫文靖士毅阿相國爾泰阿文成桂皆公所賞識者後皆為封疆大吏其子文襄王復以英年擁節屢鎮邊隅累世三公門多故吏殊有袁氏之風

聞公款待下屬每多謙冲與其同几共榻毫無驕汰之狀汪文端公死公為之代請得廕其子承霽為部曹舒文襄公籍沒遭戍公代贖其宅俟其歸而贈之故皆感佩其德久之不衰然於恩怨分明有詆之者務為排擠又頗好奢靡衣冠器具皆尚華美風俗因之轉移視諸盧懷慎布衣脫粟呂蒙正之休休有容者殊有愧於昔也

### 私造假印案

嘉慶己巳冬工部有書吏王書常者私鑄假印冒支國帑其於欽派歲修工程皆假捏大員名姓重複向戶曹支領每歲耗銀

至數十餘萬兩久之為工頭某告發始置書常於法大吏降黜有  
差夫水曹支領銀兩必須諸司空簽押畢關知戶曹度支大員復  
加查覈然後發帑定例本為詳慎乃諸部曹夤緣為奸伺大員談  
笑會飲時將稿文雁行科進諸大員不復寓目仰視屋梁手畫大  
諾而已更有倩幕友代畫者其習已久故使奸蠹胥吏得以肆其  
奸志嗟夫於照常供職之事尚復泄沓若是又安望其興利除弊  
致吾民於熙皞之世也哉宜夫我皇上屢降明諭諄諄之告誠  
也

伊桑阿

貴州中丞

伊桑阿

高文端公兄子也累任封疆以貪黷聞為下吏

舉發

上命初頤園侍郎往詢得實解京正法上怒其暴虐復

遣侍郎

瑚圖靈阿於中道賜死伊初聞

旨以為詐偽不肯受

命瑚使人縛之乃叩頭乞貸須臾以待

恩命之至瑚笑曰曩昔

威望皆往何處去也因以帛勒斃夫以封疆世族至於玩法致罪

已無顏以對人乃搖尾乞憐如犬彘就死狀真不知是何肺腑也

### 盛京先朝舊物

盛京

清甯宮貯

文皇帝時釀燈屢見

純皇帝之詩又

崇

謨閣藏

高皇帝舊履以牛皮為之為護以綠皮雲頭又有

先

朝登山負物木架所持拐杖皆白木為之制甚樸素想見祖宗  
開創之艱公劉走馬之什古今若何符節也

### 洪文襄之降

文皇之收服洪文襄事已詳前卷中聞范冢宰建豐言洪被擒時  
文皇命先文肅公往說洪謾罵不已文肅以善言撫之因與談  
論今古事時有梁間積塵落洪襟袖間洪屢拂拭之文肅遽辭歸  
奏文皇曰承疇不死矣其敝衣猶愛惜若此況其身邪後文襄  
果降如公所料云

### 黃文襄設幕館事

黃文襄事蹟已見前卷聞公督陝甘時正值西北用兵公督師肅州乃設一公館凡藩臬兵備道州縣等所司軍旅事者皆寓其中公鎮日危坐中堂其郵騎至直入館院公啟封視之應付何司者立時分派目擊其抄稿鈐印畢即以咨覆故應付急速無以留滯軍事得以易藏司軍事者宜以為法也

### 五國城

五國城在今白都納地方乾隆中副都統綽克託築城掘得宋徽宗所畫鷹軸用紫檀匣盛座千餘年墨跡如新又獲古瓷器數千件因得碑碣錄徽宗晚年日記尚可得其崖略云於天會十三年

寄跡於此業經數載始知金時所謂五國城即此地也

禮烈親王纛

先烈親王同鄭莊親王征輝發夜間大纛頓生光燄鄭王欲凱旋  
先烈王白馬知不為破敵之吉兆也因整師進卒滅其國故今余  
郎中纛頂皆懸生鐵明鏡於其上有異於他旗之纛按定制纛頂皆用銅火燄  
蓋以誌瑞也

桂香東侍郎

覺羅香東侍郎

桂芳

興祖直皇帝裔也為兩湖制府圖公思義

孫性豪宕中嘉慶己未進士上召見曰奇才也因日見信任不

數年即登九列家素貧窶然不鳴一錢門生有餽納者公曰以束脩贄先生其誼甚古然某任司農尚可充用不敢拜受其惠因封還之時相有以苟且為政者公深惡其人至面責之曰不意宗臣中有如公之行者真汗蠟帶間物矣某公恨之次骨然亦無如公何也癸酉秋林清之變公擬奏稿數條預以示董蔗林董曰公言雖是恐不能迎合上意公正色曰此何等時尚以迎合為言耶董公為之拜謝乃已其奏上上皆嘉納之甲戌春欽命往粵西審辦成林案病寓於武昌未數日暴卒上悼惜之獎以忠鯁有古大臣風焉先是公祖制府公公父觀察公恒慶及公身三世



皆沒於楚中亦一異也

張若瀛

張若瀛文和公之族姪也以吏員任熱河巡檢純皇帝幸灤陽有隨侍太監某滋擾民間若瀛撫以善言太監愈咆哮乃命縛之立加大杖數十方敏愨公時督直省大詫曰張某瘋矣乃立劾之上察其情曰非太監恣情不法若瀛安敢杖之其人殊有家風誠可嘉也因立擢為同知而遣戍其太監真聖主大度有異於人也

書劍俠事

余友畢補垣云粵西永甯州有陳氏者家巨富嘗飲於州署中席間有偉丈夫闐然至衣服鮮美年甚髫髻與州牧款洽陳異其人訊諸州牧牧曰此所謂李氏子至州已三載惟以交納官吏為事實未詳其世族陳有少女因欲贅李為壻倩州牧為媒李慨允之惟約曰每月有數夕吾應夜出會客莫相為阻陳允之既贅數月每夕出終夜不返所招徠者皆戎冠奇服相貌倣醜之輩陳叟亦頗悔為姻既已贅之無如何也吳中有葉氏子者少無賴好劍術有老嫗導之能以劍為雙丸納諸口中又能使人以白刃擊其肩背終無血迹老嫗因曰此麻姑避劍法也葉拜學其術因出游於

外時 王師征緬甸有轉餉至楚南沅州者一夕忽失銀數百緡  
守吏大驚因督責胥隸捕緝終日笞撻有老胥曰銀至數百緡非  
一人之所能持如其夥眾多聲應喧沓何以守者聞然無所聞見  
其中必有異也因號泣路旁葉氏子適至沅異而問之老胥告其  
故葉憐其老曰吾可為代覓之因赴滇黔物色之終不得其要領  
一日路之永甯遇李生於途詫曰此小李將軍也奚以至此因問  
諸路人曰此陳氏贅壻也葉氏子遂至陳宅告楚中失帑之故陳  
亦訝曰數日前吾壻頗暴富未審其財物所自豈即盜官項耶葉  
日夜中令汝女細詢之陳叟告其女晚間李生至入戶見妻色懷

然曰此必有異因究詰之女戰慄無人色長跼以謝李生疑有他故因拔壁上劍將斬之葉氏子自窗躍入曰不可害良家女洩其機者為某甲請斬吾首可也李嗒然棄劍曰吾兄奚至此吾事敗矣不可久居於此葉氏子忿然責之曰吾儕以義為重豈可盜官家物使遺禍於他人以遭天譴也李生曰諾兄可速回楚官帑保無遺失吾亦棄此而他徙矣葉氏子因辭陳叟歸李生亦以其日棄家去不知所之是夜沅庫得所失鞘封印如故葉氏子既歸吳中數載相物色者愈眾葉氏子曰布衣而享妖異之名其禍足以殺身因辭其父母云欲之點蒼山學道至今未歸云此甲寅秋日

告余者今補垣已歿廿載未知其事確否聊漫錄之以誌異云

洪文襄款客

洪文襄晚年既謝事復獨居侘傺有其同鄉士人往謁公拒不見士人歸旅邸無聊甚晚間喧傳相國回拜已至門矣士人趨出公降輿握手故作寒溫泛語久之入則四庭肴饌備陳珠簾繡幕華燈輝燭公延客入首席陪座者皆一時名士既而笙管繽紛伶工畢集演劇數齣酒數行罷公起告辭士人送出公又辭讓須臾乃登輿去士人返舍依然寒燈如豆破壁頽垣猶如故也蓋公久蓄將畧無所施為聊借款客以展其懷抱耳

張文端代作詩

王文簡公士禎詩名重於當時浮沉粉署無所施展張文端公英  
時值南書房代為延譽仁皇帝亦素聞其名因召漁洋入  
大內出題面試之漁洋詩思本遲滯加以部曹小臣乍覩天  
顏戰慄搯觚竟不能成一字文端公代作詩草撮為墨丸私置案  
側漁洋得以完卷上笑閱之曰人言王某詩為手神妙悟何以  
整潔殊似卿筆文端公謝曰王某詩人之筆定當勝臣多許上  
因命文簡改官詞林因之得置高位漁洋感激文端終身曰是日  
微張某余幾作曳白人矣

高江村

高江村

士奇

華亭人家甚貧窶鬻字為活納蘭太傅

明珠

愛其才

薦入

內庭

仁皇喜其才便捷凡遇

巡狩出獵皆命江村同

禁籞羽林諸將校並馬扈從故江村詩曰身隨翡翠叢中列對  
入鵝黃者裏行蓋紀實也江村性趨巧遇事先意承志皆愜聖

懷一日

上獵中馬蹶

上不憚江村聞之乃故以瀦泥汚其衣

趨入侍側

上怪問之江村曰臣適落馬墮積瀦中衣未及浣也

上大笑曰汝輩南人故懦弱乃爾適朕馬屢蹶竟未墜騎也意  
乃釋然又上登金山欲題額濡毫久之江村乃擬江天一覽四

字於掌中趨前磨墨微露其迹 上如其所擬書之其迎合皆若此也

### 內院筆帖式

國初海內甫定督撫多以漢人充之凡文移用 國書者皆不省識每省乃委內院筆帖式數人代司清字文書後內三院改為內閣翰林院繕書房等署而督撫衙門筆帖式仍沿舊銜未及更正云

### 裕陵聞香

刑部侍郎 永祚

言其任工部司員時督辦 純皇帝大葬禮事甫



啟地宮石門聞有異香自隧道出清芬可愛如是者數日乃已蓋  
寢宮幽閔日久山嶽秀氣所鍾靈也

蔣文肅入場

蔣文肅赫德初名元恒永平樂州人幼為諸生善望氣數明天啟  
丁卯公赴科場夜間聞明遠樓鼓聲驚曰此頽敗之氣其國安能  
久長故不終闌而去徧遊九邊云王氣葱隆聚於遼瀋其間必有  
聖人御世吾蓄材以待可也逾年文皇帝入關公杖策軍門  
上閱其文喜之因改今名遂攜出塞不數載以致大拜云

陳提督

乾隆己巳 上命工部侍郎三和修理靜漪園別館中有複道可  
通西苑 上幾暇之餘嘗乘小輿率諸內侍數人由複道往監工  
外庭殊未知也時陳提督杰為中營千總日夕危坐宮門側督率  
工匠構締初無怠容 上心識其人諭傅文忠曰汝中營有偉髯  
千總其人勤樸可任事因詢其名姓命文忠保薦之不數載遂至  
專閫云

祿相公

宗室相國祿康為誠毅員勒奮於宗室中屬長行嘉慶初輔政數  
年繼和相既敗之後欲反其政故持躬清介馭下寬大僚屬感其

小惠翕然呼為良相然才具庸劣無所建白又不甚識字於古今政體毫未寓目其所掄持率皆以市井毀譽為之趨慕罔識朝廷大體故一時叢脞成風每多苟且之政最可哂者一日余會公於禁中蒙公教誨甚篤余因述其祖德公報顏曰先世身遭刑戮安敢計功余為之駭然按誠毅貝勒為顯祖幼子開創時勲勞稱最以病薨於邸經太祖親臨哭奠立碑旌功事具國史而公所言如此誠為駭異因細詢之乃誤以褚英貝勒之事歸之誠毅按褚英貝勒為祖長子以事賜死太誠所謂數典忘其祖矣後以故縱與夫聚賭事降副都統復以失察曹倫事遣戍遼東侘傺以卒夫以天潢

貴胄而不學無術至此安可以常調羹重任也

### 亮總兵

伊爾根覺羅總兵

亮祿

以世廕任河南城守尉嘉慶庚申川楚教

匪滋事已逾數載豫省將校皆檄調他往撫軍吳公熊光亦率兵

堵禦盧氏腹心千里兵力虛弱故寶豐郟縣教匪藉以謀逆時布

政馬公慧裕護撫篆省中惟滿兵千人而已馬公因命公率滿兵

同往馬公固書生未嫻軍旅公曰吾聞兵貴神速未聞遲巧今賊

初滋事率皆烏合之眾易於撲滅不可使其蔓延日久有害蒼黎

也乃驅兵疾行未三日至賊尚未知覺公即率兵圍其堡寨聲言

滿兵自京中至數逾十萬賊未知虛實使偵者探伺公命樹八旗  
大纛五色絢爛並命兵卒以鞭笞馬腹使其騰蹶嘶號聲震數里  
賊已畏懼至夜間公起曰此正擒賊時也因吹角命士卒喊號進  
公首先踰濠焚其寨堡士卒益用命一鼓殲之回報馬公馬公方  
踞鞍危立戰慄不能上馬也事聞上大喜立擢公副將後任雲  
南開化鎮總兵未逾年卒於任按竇豐為中原腹心之地四通八  
達無不襟連微公乘賊之瑕即時撲滅儻至盤踞日久豕突於江  
淮濠潁之間則其禍有不忍言者矣若公者謂之社稷之臣可也

趙勇王

趙勇王

成衮札布額駙襄親王之長子也

襄親王光顯寺之戰功

在社稷

事見後卷

王嗣掌定邊左副將軍印父子專閫軍中禁之其族

貝勒青滾雜卜因其兄額林沁多爾濟以故縱阿逆故賜死

事見前卷

陰煽惑諸喀爾喀蒙古諸藩曰元太祖奮無正法理欲共謀叛逆

其檄至王所王大怒曰焉有人臣犯法而其骨肉代為復仇之理

吾家世篤忠貞豈可效叛人之謀自蹈誅夷也因首發其謀復寄

札於哲卜尊丹巴胡圖克圖令其諭所部知大義俾勿感事聞

純皇帝嘉之即命王統師以勦曰大義滅親此王茂宏所以仗安

東節也王率諸喀爾喀藩部兵力為追捕青滾雜卜計窮擁兵自

衛王傳檄諸部宣布 國家威德其黨皆散惟餘青滾雜卜父子  
數人宛延沙漠中迷失道路為官兵所擒 上大悅賜王金黃帶  
封其子為世子以優賚之王白哲微髭數莖不類蒙古世族知兵  
法有元臣木華黎所著兵法王氏收藏之暇時擁一編展誦故用  
兵多合古法掌大將軍印幾四十年未嘗戮一褊卒曰三世為將  
道家所忌吾敢恣意誅戮貽禍於後人耶其弟郡王車克登布以  
勇捷見稱 上嘗以霍去病曹彰比之

### 軍營之奢

宗室副都統

東林

文皇帝第十子貽塞裔也任侍衛時從征川

楚教匪凡十餘年其親為余言者云軍中糜費甚眾其帑餉半為糧員侵蝕任其濫行報銷有建昌道石作瑞曾侵蝕帑銀至五十餘萬兩然其奢費亦屬糜濫延諸將帥會飲多在深箬荒麓間人迹之所罕至者其蟹魚珍羞之屬每品皆用五六兩一席多至三四十品而賞賜優伶犒賚僕從之費不與焉有某閩部初至石為饋珍珠三斛蜀錦一萬匹他物稱是故其所侵蝕者轉皆蕩盡至死無殮費人皆快之軍中奢靡之風實古今之所未有也聞明叅政亮言其隨明忠毅公瑞征烏什回部時軍中大帥惟有肉一截鹽酪數品而已其事未逾數十年而其風變易至此其作俑者可



勝誅乎

李激芳

李侍御激芳四川人巡視中城有傳文忠公家奴藥大恃公之權勢招徠無賴輩肆行市衢間無人敢過而問者公慨然曰傳相以忠謹傳家故能奕禩而保大其家奴游蕩非公所能知者不可使其風日滋反貽累於枌房其攸關甚鉅乃命捕大審得實立登白簡純皇大悅立遣戍藥大傅公罰鍰有差而擢公為給事中以旌其直焉其後以諫匿灾事失實降官人爭惜之

俄羅斯

俄羅斯國在喀爾喀烏里雅蘇臺之極北東西袤長數萬里東接黑龍江西延安集延教罕諸部落其人黑皙盲目衣服食物言語文字皆近西洋與蒙古部落習俗懸絕其文官皆洋中人為之武官始參用本國人其主名察罕汗女傳已七世生男則為異姓人生女始為國種又蒙古源流云元太祖之長子分封絕域來往數萬里事見元史即為俄羅斯之始祖云然則彼國亦元裔也其世系萬可考矣

熊志契

熊文端公賜履

漢陽人相

仁皇帝先後幾三十年忠清剛介崇

尚理學當時號為賢相竟時家無擔石賴族人熊本主喪始獲葬  
焉其暮年始生子名志契公甚鍾愛然志契才智庸劣幼失怙恃  
無人訓迪遂至目不識丁 仁皇念公舊德 召見志契欲賜科  
目因問曰汝所羨慕者何志契童駭因遽曰我欲策蹇驢遊都市  
中 上嗟嘆曰賜履無子矣因命歸乾隆甲子授翰林院孔目遂  
命上駟院賜驢一頭以遂其志後志契以孔目終其身歷官幾  
四十餘年乾隆丙午始卒年已七十餘矣

### 阿文成相度

阿文成公與和相同值軍機大臣十數年既薰蕕不相合乃除

召見議政外毫不與通交接凡立御階之側公必去和相十數武愕然獨立和就與言政事公亦漫應之終不移故處也安南國王阮光平至京遣其臣饋公土儀公取一二物使人出曰中朝公相問陪臣好汝國王既誠心朝覲其優賚厚寵皆出自皇上體恤遠人之意莫謂中朝相公不識順逆二字也其陪臣汗流夾背出謂人曰此誠宰相語公有上賜馬一日脫繮去國人入告公方觀書曰覓之既獲復命公徐曰好仍讀書如故其相度也若此

蔡必昌

蔡太守

必昌

任四川重慶守云能過陰間預知冥中事傳文襄王

征廊爾喀時蔡往謁見王因問此行休咎蔡云此次行軍藏事必連冥中祇造冊數月此後不數年川楚間當有大劫難至冥中已造冊數年尚未已也王因問冊中名姓蔡憮然曰未來事不可預言依稀記得秋帆制府乃冊中首領也其言乃甲寅七月望日洪大令慶祥親告余者其時楚中尚無兵燹之事余責以為妄言休咎明年果有楚苗之變其後川楚教匪蠢動兵連九載始得蕩平果如洪令所言云

按雜錄中不錄鬼怪說誕之語以為近日奇異小說過多有意避其窠臼惟載此段與費直義公事者

費事載後費事乃余幼聞

先人所述必非荒渺之語此言實係余聞於未變之先者故漫記之以誌異云

### 四神祠

太液池北岸大西天寺中有四神祠狀貌偉然甲冑峙立聞故老云為瓜爾佳直義公費英東舒穆祿武勳王楊台利鈕祜祿果毅公額亦都瓜爾佳公勞薩四公之像孝莊文皇后念其舊勲故塑像祀於朝中乾隆戊寅寺中災太監等往撲救見四像宛轉欲動急扶之出四神像即似趨行狀不數武已至門外得以無恙亦一異也

蘇相國

蘇相國凌阿姓他塔拉氏中庚申舉人晚年與和相聯姻始游公卿齷齪守位無甚表見任江督時貪庸異常每接見屬員曰皇  
上厚恩命余覓棺材本來也人皆笑之其劾楊天相誣盜案事眾  
皆為楊挽屈正法日六營合祭哭聲震天幾至激變賴陳軍門  
大用安撫之始已其入閣後龍鍾目眊至不能辨戚友舉動賴人  
扶掖瑤華主人弘時嘗笑謂余曰此活傀儡戲也和相賜死後公  
即予告復命守護裕陵久之乃卒然其少時充中書舍人請諾  
於政事堂中眾皆笑其庸劣惟鄂文端公曰諸君莫輕視蘇公其

人骨相非凡將來必坐老夫位也人皆以為公一時謔語後卒踐其言亦一奇也

### 楊誠齋軍門

楊誠齋軍門芳貴州人少貧屢讀書應試未就乃充行伍積軍糧以贍其家乾隆乙卯楚苗竊發毗連黔境銅仁諸苗亦乘時蠢動攻銅仁寨時遊擊為孫總兵清元欲棄寨避賊公奮然曰芳聞咫尺才土莫非為天子所守者奈何委之於賊孫壯其言因與賊戰乃至敗績時福文襄王督師命諸將移寨聞兵敗怒欲置孫於法孫叩首曰非裨將之過皆楊芳一人意也王命縛公至詰曰汝何



人乃敢抗吾法時兵衛森嚴堂宇深邃公大聲曰芳幼讀聖賢書  
惟知忠孝字今寨雖小為天子所界付若輕棄是違君命也  
故芳欲一戰以楊士氣其勝之與否自有主之者非芳之罪如使  
芳執役效命早裹屍馬革矣言既終愀然長嘯王壯其言命為親  
軍日見委任不數載官至再闡公與楊時齋軍門為布衣交遂至  
通譜公善謀時齋善戰二公如左右手不可須臾離者其守陝安  
鎮政令寬洽民感其惠公嘗入陝見其署篆者暴虐激變營兵  
亂軍蒲大芳揭竿而起然感公舊德曰楊夫人在慎勿殺害也因  
共昇夫人轎送出南山共拜叩去其善馭士卒也如此

信莊二王生命

信恪郡王

如松

莊慎親王

永瑋

同年月日生莊惟後信數刻時互

以弟兄稱之稽其福命信先莊薨十七年然其子恭王淳穎以復

睿忠王爵故因贈王為親王莊恪王無子嗣其弟子承襲信恪王

少封公爵任工部侍郎等官莊恪王少亦賜公品級歷副都統等

官雖文武少差而其陞轉如一亦一異也

先悼王善六合槍

先悼王諱

椿泰

先良親王嫡子幼襲王爵濶懷大度撫僚屬以寬

恕喜人讀書應試人皆深感其惠善舞六合槍手法奇捷雖十數

人揮刀敵之莫之能禦又善畫硃砂判嘗於端午日刺指血點睛故每多靈異余少時尚見一軸其判俯首視傍側如有所覩每使人警畏云

欽訓堂博古

宗室輔國公

永璚

號素菡理密親王孫也好收藏古字畫書籍善

為甄別真偽凡經公品題者百無一失故收藏家皆首推之汪文端公嘗倩公分別所藏卷軸公撫摩終日曰惟米襄陽一帖近真迹其餘皆偽鼎也汪為之勃然變色公亦不顧也余幼時拜謁其室見架上書卷粉披惜未得一寓目近聞皆至散佚殊可惜也

趙護衛

趙護衛名赫紳其先蒙古人為余邸僚屬性忠醇先修王命傳先恭王凡醫藥飲食皆賴以調護乾隆乙亥春邸中有護衛雙愛者出境滋事先人効之愛因反噬為奉先人命者而引護衛為證時先人與時相不睦因嗾某尚書欲坐寶其事時尚書據高座侍郎等左右列護衛囚服縲紲入尚書故作怒狀欲護衛引陷先人加以三木者再護衛仰天大呼曰如本王知情方隱匿之不暇敢據實以入告乎皇天后土實鑒斯情赫紳雖死不敢誣王以求活也尚書為之氣奪時趙方伯孫英為部郎因進言曰紳已老不可再

加以刑何不以鞠紳者而鞠愛也尚書語塞不得已引愛鞠之甫  
加刑愛即輸服先人之冤始白而護衛卒以創死

費武襄公知大體

費武襄公楊古以咸曉故封伯爵為撫遠大將軍征噶爾丹既奏  
凱眾皆欲露布揚功績公却之其奏摺惟言兵至某處失迷道路  
宛轉山徑中數日又於某處敗績又於某處絕糧數日皆臣失算  
之故賴 聖天子洪福得以無慮今微幸成功實出意外之語幕  
客或咎其失體制公曰 天子深居九重如見奏功之易若此必  
長其好大喜功之志軍中士卒勞瘁不可不令 上聞之以消異

日窮兵黷武之患也人皆服其言得體云